



Akcija Pretres porodične vile, firme i drugih objekata na području Ljubuškog i Tomislavgrada

SIPA provjerava račune sina Zdravka Mamića

LJUBUŠKI - Pripadnici **SIPA** pretresli su juče na području Hercegovine porodičnu vilu, firmu i druge objekte koje koristi Mario Mamić, sin Zdravka Mamića, alfe i omege Fudbalskog kluba Dinamo!

Pretresi su počeli u ranim jutarnjim časovima na području Ljubuškog i Tomislavgrada, na molbu hrvatskog USKOK-a koji već duži period sprovodi istragu protiv Mamića zbog krivičnih djela zločinačkog udruženja i zloupotrebe povjerenja u privrednom poslovanju, te pranja novca.

U **SIPA** je potvrđeno da su pretresi obavljani sa ciljem pronalazjenja i privremenog oduzimanja dokumentacije i drugih predmeta koji mogu poslužiti kao dokaz da je Ma-

mić počinio krivična djela za koja ga terete hrvatski istražioci. Slične informacije saopštene su i iz Tužilaštva BiH, koje je navelo da se ove aktivnosti sprovode u okviru istrage koja se vodi u Hrvatskoj i BiH, ne samo protiv Mamića, već i protiv više drugih osoba.

- Radi se o složenoj istrazi i transakcijama u višemilionskim iznosima. Obavljaju se i provjere finansijskih transakcija i poslovanja osumnjičenih u BiH. Zbog zaštite istrage u ovom trenutku ne možemo dati više detalja ili informacija - naveli su u Tužilaštvu BiH.

Više informacija o pretresu juče nije mogao dati ni Mamićev advokat Čedo Prodanović, koji je kazao hrvatskim medijima da nije obaviješten o pretresima. Prema



VELELJEPNA VILA U LJUBUŠKOM Mario Mamić prao pare preko BiH?

nezvaničnim informacijama, istražioci su juče, između ostalog, provjeravali tri bankovna računa u BiH, koja se dovode u vezu s Mamićem. Riječ je o njegovom privatnom računu otvorenom u jednoj banci u BiH, kao i poslovnom računu otvorenom na ime njegove firme "Sport servis MM" iz Ljubuškog. Po-

red toga, provjeravan je i račun Mamićevog šurjaka Marka Kravića (32), koji je inače odgovorna osoba u njegovoj firmi u Ljubuškom.

Mamiću su još u decembru prošle godine blokirani bankovni računi i sva imovina u BiH, čija se ukupna vrijednost procjenjuje na oko 2,6 miliona maraka. **Sn. K.**